



Jumat, 03 Januari 2025
Ogen: Matius 1:18-25



"Dibata ras Kita"



Dua wari nggo sibentasi tahun baru; tentuna melala pengalaman-pengalaman subuk meriah-susah; tawa-tangis; sehat-sakit; erteman-la erteman; ersen-la ersen; ikagumi-iciani si ialami kita radu ras keluarganta. Pengalaman e mabai kita tetap nggejapken penemani Tuhan nandangi geluhta; janah pengarapennta pe maka i bas tahun enda melala pengalaman-pengalaman si isehken Tuhan si ialami kita radu ras keluarga bage pe teman-temanta, janah pengalaman e sigejapken cara Dibata erdahin lako ncidahken kerna kuasaNa. Maria-Jusuf i bas ndalani perdalanen geluhna pe igejapkenna cara Tuhan si erdahin lako encidahken kuasaNa. Pengalaman Maria si ngaloken kuasa Tuhan arah Kesah Si Badia seh maka mehuli kula Maria e pe igejapkenna keleng ate Tuhan si erdahin; Jusuf sekalak si bujur selaku tunangen Maria pe tetap ndalani kerna kai si isuraken Tuhan nandangi geluhna. Duana kalak enda ngaloken cara Tuhan erdahin aminna gia cara e la terantusi secara akal pikirena. Maria-Jusuf ngaloken sura-sura Tuhan rikut pe ras perkatan malaikat si mpetetap ukurna duana; *"O Jusuf , kesusuren Daud, ola kam mbiar muat Maria jadi ndeharandu. Sabab anak si lit i bas bertinna e jadi erkiteken kuasa Kesah Dibata...., anak e pagi igelari Immanuel (Dibata ras kita)"*. Perkatan Tuhan si sehken malaikat e mpengasup Maria-Jusuf guna ngaloken kuasa Dibata e. Perdalanen geluhta rikutken pengalaman-pengalaman si nggo si dalani banci jadi labo kerina kel terantusi kita alu akal pikirenta, megati si akap kita la mungkin e reh man banta si sehken Tuhan gelah arah si e reh sigejapken kerna kuasa Tuhan, bali bagi pengalaman Maria ras Jusuf. Dibata ras kita tema peteluken i bas tahun si mbaru enda jadi pergegeh dinging gelemen man banta guna ngaloken dinging ndalanken sura-sura Tuhan bas kegeluhen e. Kai pe la lit kebiarenta adi Tuhan ras kita.